

31. Vates, post sacrificium ablutus, utrumque fratrem, quorum cincinni corporis inclinatione movebantur, post benedictionem iis impertitam, tetigit manu, cujus palma sacro gramine fissa erat.

32. JANAKAS, *Mithilæ* rex, sacrificii præparationibus finitis, invitavit vatem, qui, obedienter *Mithilam* tendens, RAGHUIDAS etiam secum duxit, gaudio repletos, cum de regis arcu audirent.

33. Ab iis, iter facientibus, vesperi habitatio eligebatur sub amœnis eremi arboribus, sub quibus GAUTAMÆ, diuturnas castigationes subeuntis, conjux per breve tempus INDRÆ uxor fuerat.

34. Quod GAUTAMÆ uxor, in saxum transformata, pulchrum corpus in longum tempus recuperavit, hoc erat beneficium RÂMÆ pedum pulveris, peccata destruentis.

35. JANAKAS, hominum rex, cum audisset vatem una cum RAGHUIDIS aggressum esse, obviam ivit venerabundus, ac si fuisset Honestum, corpore indutum, comitantibus Utili et Dulci.

36. *Videhæ* urbis civium, juvenes, *Punarvasui* sideri, de cœlo in terram aggresso, similes, oculis haurientium animus ciliis connivere etiam fraudem putabat.

37. Cærimoniis sacris circa palum sacrificalem peractis, vates, KUSIKÆ familiæ decus, temporis gnarus, *Mithilæ* regi narrabat, RÂMAM arcus videndi cupidine ardere.

38. Rex, conspiciens tenerum corpus pueri, e celebrata familia oriundi arcumque suum ægre flectendum cogitans, cruciabatur pretii, pro filia donandi, conditione.

39. Dixitque: “Venerande, quod a magnis etiam elephantis ægre perficitur, in eo equidem permittere nequeo elephanti pullum frustra contendere.

40. “Etenim, sancte, multi reges arcitentes hoc arcu pudore affecti, concutientes brachia, quorum cutis nervi ictibus occalluerat, indignabundi abierunt.”

41. Cui respondit vates: “Hic quid valeat, audi!—Attamen mittamus sermones: ille enim robur suum probabit tibi in arcu, ut fulmen in monte.”